

摘藻堂四庫全書薈要

集部

欽定四庫全書薈要

集部

中州集卷五



詳校官候選知縣臣吳甸華

欽定四庫全書薈要卷二萬七十八

集部

中州集卷五

戊集

金 元好問 輯

御史肅 三十首

肅字舜元京兆人僑居北京之和衆幼孤養於外家天資挺特高才博學作詩精緻有理尤善用事古賦亦奇峭工於字畫業科舉為名進士立朝為才大夫優於政事嚴而不苛所至有聲



吏畏而安之累以廉陞歷赤縣及幕官入為監
察御史遷治書出刺通州大中黨獄起為所註
誤謫靜難軍節度副使大安初召為中都路轉
運副使超戶部正郎復坐鑄降同知汾州事卒
官舜元素尚理性之學屏山學佛自舜元發之
晚年頗喜養生謂人可以不死嘗欲棄官學道
而竟止於此可哀也已詩號澹軒遺藁今在燕
都鄭庭幹家其平生則見之屏山故人外傳云

偶讀賈逵之邀飯帖有感作詩哭之

微官已歎鸞棲屈異事俄傳鵬告凶
彩筆書來墨痕濕玉樓人去酒尊空
當時快意牛心炙今日傷懷馬鬣封
一幅銘旌送哀挽白楊蕭索九原風

河上

堤外三竿日河邊八尺泥
夜風喧馬櫪秋露冷雞棲
歲月吾生老關山客夢迷
故園桃李樹搖蕩不成蹊

別張信夫

破壘殘星沒寒城曉角孤天低雲錯莫野曠雪模糊小
市千錢米征人丈八及邊愁故未已不敢恨長途

別懷玉

官曹不着市門仙綠髮怱怱換少年慣作簿書塵裏夢
愧無山水窟中緣蜂腰鶴膝曾搜句兔角龜毛不論禪
此別相思渺何許一川山色雁連天

山陰縣

湧雲驅雨不成霖山徑危行未要深午夢初迴鳥鳥樂

小亭斜日柳陰陰

方丈坐中

紙本功名直幾錢何如付與北窗眠
詩書作我閒中地風月知人醉裏天
水底游魚真見性樹頭語鳥小參禪
平生習氣蓮華社一炷香前結後緣

早出遵化

朝來對酒不能觴看盡西風去鳥行
山好未忘三日雅詩窮贏得一秋忙
強顏紅葉自由舞野性黃花無賴香

多謝殷勤暮雲影更留淡墨寫溪光

宿睦村

闌干河漢已西傾獨坐披衣過五更
簷馬丁東風外響田車歷轆月中行
忘形沙鳥知人意宰地山雲不世情
露草霜筠有幽意詩題分付候蟲聲

次韻安之飲酒

日上南窗已數竿醉頭扶起不巾冠
欲開社瓮多招客先乞兵廚暫補官
玩世惟知酒功聖藏身無似醉鄉寬

麒麟閣上功名字不博生前一笑歡

過九里山

斷蛇扛鼎兩爭雄陳迹荒涼萬事空今日山前無過客
數株衰柳管秋風

道傍柳

秋霜一何嚴凋此道傍柳殘枝幾葉在其勢不得久憶
昨三春時濯洗煙雨後弄姿舞婆娑勸我一盃酒別後
遽能幾忽忽成老醜人生非金石長短百年壽功名與

富貴於身亦何有古人隨物化今已柳生肘我獨何為
哉窮年事奔走長堤隱落月駐馬一回首春風柳梢黃
定得西歸否

登憫忠寺閣

淨宇懷超想層梯企俊遊喧卑三界盡製作六丁愁聚
土閒童子移山老比丘能除分外見寸木即岑樓

讀傳燈錄

閉戶懶不出真成住夏僧肝腸雖自苦面目得人憎處

世若大夢學禪猶小乘早知文字悞更用讀傳燈

夏夜

一雨昭蘇外羣山宴寂中移床就佳月引袂納涼風蝸
舍憐渠小蚊雷訝許同幽懷悶清境舒嘯夜將終

物化

物化能忘我天遊不用心羶香羣蟻聚樹靜一蟬吟敗
井勞深汲荒庭闕近尋枕書聊假息夕日半牆陰

立秋日

舊穀催新穀，今秋似去秋。
年衰猶健飯，官達也窮愁。
樹鳥依依宿，簷螢細細流。
箇中詩句在，倚杖得冥搜。

感興

避俗嫌高絕，干榮恥盜誇。
居貧偶從仕，學道不忘家。
樹果蕃秋實，園葵粲晚花。
一軒吾事了，無意競紛華。

偶書

東風數點梨花雪，吹我傷春萬里心。
知有高亭堪眺遠，惜無佳客共登臨。
晴雲入戶團傾盖，飛鳥隨人作好音。

寒食清明少天色孤居未要酒杯深

放言二首

蓮社從來說陶遠竹林今不數山王家雞野鷺何須較
秋菊春蘭各自芳

又

清風明月無人管茶鼎薰爐與客同壯歲羞為襦襤子
如今却羨嘯嘯翁

曉出東廬

谷口子真隱水濱韋氏莊鷗鷺賓客對鴻雁弟兄行小
圃叢生竹平林半是桑朝陽生野渡濕盡馬蹄霜

次張信夫韻

絳帳先生寄一州不教文字到橫流草玄只擬關門坐
好事應從載酒游虎穴已曾探虎子龍溝未信出龍頭
錦囊詩句年來滿供盡閒花野草愁

髮脫

年年道路少清歡處處葵蔬餽薄冷月色過窗同夜夢

霜華著壁獨朝寒求醫未有詩千首破老惟消竹數竿
衰髮從今不須脫少留衰白戴黃冠

立秋日

畏景流庭過涼颼即坐來物隨時共換人覺老相催
蝶依叢穩嘶蟬抱樹哀玉簪香好在牆角幾枝開

復齋

居士年來一復齋馴庭鳥雀絕驚猜雨添窗下硯池滿
風揭床頭書卷開身似卧輪無伎倆心如明鏡不塵埃

紛紛寵辱人間世付與浮雲任去來

北潭

竹陰松影玉葱龍十里平堤一徑通碧水乍開新鏡面
青山都是好屏風寒蟬高鳥清愁外折葦枯荷小景中
酒力未多秋興逸夕陽聊貸半林紅

晚興

秋蟲已息又還吟晚雨初晴又作陰水面微風掠蒼玉
雲頭落日緣黃金年豐酒價應須賤睡起茶甌未要深

人道雙清到心迹年來無迹亦無心

雜詩二首

春江日暖舞清漣客舍蕭蕭一縷烟幽鳥隔林招我醉
小桃當戶為誰妍禪心已作沾泥絮詩思渾如上水船
却是官閒得無事一簾紅雨枕書眠

又

南皮城下荒秋草說是當日燕支臺世事翻騰只如此
吾生棄置已焉哉迎風紫萸因循老背日黃花次第開

獨夜不眠思阿謝
白羊如駕小車來

春雪

豐年不救兩河飢
臘盡纔看小雪飛
謾說春來膏澤好
其如壟上麥苗稀
空花只解驚愁眼
濕絮寧堪補敗衣
頗笑西臺瘖御史
日斜騎馬踏泥歸

蕭尚書貢三十二首

貢字真卿咸陽人
唐太傅寘十七代孫
博學能文不減前輩
蔡正甫大定二十二年進士自涇

州觀察判官召補省掾不四五月拜監察御史
累遷右司郎中預脩泰和律令所上條畫皆委
曲當上心興陵嘉歎曰漢有蕭相國我有蕭貢
刑獄吾不憂矣又奏死囚獄雖已具仍責家人
伏辨以申冤抑詔從之遷刑部侍郎入謝曰臣
願因是官廣陛下好生之德上大悅凡真卿所
平反多從之歷大興同尹德州防禦使同知大
名府事陝西西路轉運使河東北路按察轉運

使靜難軍節度事南京都轉運使御史中丞以
戶部尚書致仕年六十六終于家諡曰文簡有
注史記百卷公論二十卷五聲姓譜五卷文集
十卷傳於世

渭南縣齋秋雨

穴床撐拄小窗前一點青燈照不眠
簷溜淙琤風浙瀝
嫩涼如水夜如年

假梅

綠窗嬌小似梅人素手東風巧思新鸞尾剪裁千顆雪
蜂脾點綴一家春長教客枕生幽思不逐林花委路塵
莫道去非詩破的兔毫那解寫花真

臨泉道中

半世事行役茲游初未經峽門迷白晝嶺脊上青冥澗
曲莓苔滑松盤霧雨溟登危人跼蹐涉險馬竛竮落日
留行客投鞭得驛亭短牆明積雪破屋漏疎星羌笛誰
三弄羈懷強一聽葭蘆知不遠河外數峰青

自感

形骸付與甄陶外
禍福難防倚伏前
孔雀若知牛有角
應須忍渴過寒泉

荒田擬白樂天

荒田幾歲闕人耕
欲種糜蕎趁晚晴
急手剪除荆與棘
一科才了十科生

樂府崔生

徽蘭二
崔名

徽門晝暖柳啼鴉
蘭閣窗深月照紗
腰素輕盈珠極穩

鬢雲鬆亂玉釵斜春風一去空陳迹暮雨三生只當家
自倚廣平腸似石不妨綺語賦梅花

朱元章大字卷

顏楊死去誰補處米狂筆力未可涯追摹古人得高趣
別出新意成一家老蛟駭雲肉倔強枯樹漬雪冰植牙
九原裴說如可作應有新詩三歎嗟

裴說懷素草書歌
欲歸家三歎嗟眼

前三箇字枯樹植
鳥梢蛇黑老鴉

楊侯畫晉公臨江賞梅樂天與鳥窠禪師汎舟談

玄不顧而去戲為一絕以代晉公招樂天同飲

云

明粧冷蕊兩清新面纈浮光數爵頻
拭風前寒鼻液
快來同醉雪中春

漢歌

華陰雙壁傳山鬼報道明年祖龍死
草間豪傑伺天時
攘袖撫衿爭欲起叢祠篝火妖狐語
影涉為王張大楚
南公舊有三戶謠東井新看五星聚
中原茫茫走秦鹿

天遣沛公興白屋大蛇斬斷素靈號蚩尤祭罷朱旗矗
竭來扶義入關中恩結人心帝道隆秦法煩苛猶一洗
項王慄悍何勞攻三傑相須立人紀四老仍來安太子
已令陸賈說詩書更詔孫通制儀禮阿翁着手規摹遠
獨恨兒孫讀城旦王純霸雜寧不知不是不知知已晚
楚歌

沙丘車過亡明鏡人頭畜鳴自賢聖阿房殿裏醉宮娃
趙高手中持國柄羣雄雲繞蕩山東邯鄲却墮秦園中

項王一戰動天地諸侯膝行趨下風割裂河山建侯國
天下畏威心不服只貪衣繡榮楚猴豈識金刀得秦鹿
楚歌一夜四面發泣別虞姬歌數闋殘兵牢落似晨星
獨騎凌兢踏寒月烏江渡口方喚船五侯追奔已江邊
苦道天亡非戰罪劒化壯氣成飛烟君王雄武古無比
獨無仁義誰相濟向能忠計資范增未必漢家能卜世
穀城東頭土一丘悠悠遺恨何年休

悲長平

秦兵伏甲武安西趙將非材戰士攜千里陣雲沈曉日
萬家屋瓦震秋聲哀纏朽骨天應泣怨入空山鳥不棲
百戰區區竟何得阿房烟草亦淒迷

雒陽

西來洛水遶崧高野店荒村換市朝董卓搜牢連數月
郭威夯市又三朝劫灰深掘終難盡鬼火爭然忽自消
千古興亡幾春夢只將閒話付漁樵

中秋對月

去年中秋客神京露坐舉杯邀月明今年還對去年月
北風黃草遼西城年年月色長清好只有悲秋人易老
兒童不解憶長安歌舞團團遶翁媪人生宦游真可憐
不知何處度明年預愁老罷廢詩酒負此冰玉秋嬋娟
我生萬事隨緣耳居自無憂行亦喜君不見杜子閨中
只獨看鄜州寂寞千山裏

寄答張維中

北轅千里赴陪都日覺還家計愈疎人事浮雲千變化

宦途平地幾崎嶇青山有約長回首白髮無情忽滿梳
賴有同年老兄弟相思時寄數行書

保德州天橋

鬱鬱風雲入壯懷天潢飛下碧崔嵬兩崖偏側無十音
步萬頃逡巡納一盃濺沫紛紛跳亂電怒濤殷殷轉晴
雷曾聞電火魚燒尾曾趁桃花漲水來

靈石縣

古道行人少荒城亂石侵天橫機素直河入土囊深澗

近雲長潤山高日易沈田翁樂豐歲歌笑下崎嶇

真容院

魔宮佛界等空虛此理何曾屬有無直向臺山始相見
可中還有二文殊

讀火山瑩禪師詩卷

禪師隰州白氏岐山令君舉
樞判文舉之弟自幼日有詩

名河東嘗有詩云十日柴門九不開松庭雨後
滿蒼苔草屨挂起跣趺坐消得文殊更一來歸
寂後客有示其
集者因題其上

長短都歸一夢中身前身後兩無窮李愷信士今如在

定向江湖訪澤公

君馬白

我馬瘦君馬肥我馬虺隤君馬飛雕鞍寶校錦障泥向
風振迅長鳴嘶一朝計落路傍兒銅鬲為櫛薪為衣瘦
馬雖瘦骨骼奇古人相馬遺毛皮千金一顧會有期

陳宮詞

三閣花深白晝迷酒催狎客賦宮詞管絃散落春風外
一曲金釵兩鬢垂

寄嵐

寄嵐地勢橫三汊
河朔城墉挂一箕
紫塞高連寒日短
黃榆落盡長年悲

按部道中二首

窟野河津水沒腰
管岑官路雪封條
一年樂事能多少
強半光陰馬上消

又

寒城睥睨插山隅
秋半霜風塞草枯
月轉譙樓天未曉

角聲吹徹小單于

日觀峰

半夜東風攪鄧林
三山銀闕杳沈沈
洪波萬里兼天湧
一點金烏出海心

族兄才卿下第後赴宜祿酒官以詩寄之

久期老距擅文場
命壓人頭可得忙
兩腳塵泥官業晚
十年燈火夜窗涼
霜添老葉山梨紫
雨浥寒花野菊香
寒花一作寒叢南北相望無
百里幾時尊酒浣離腸

梨花

丰姿閒淡洗粧慵眉綠輕顰秀韻重香惹夢魂雲漠漠
光搖溪館月溶溶陳家樂府歌瓊樹妃子春愁慘玉容
安得能詩韓吏部郭西同去醉千鍾

後趙

擬倫人物指高光可笑臬雛不自量正使成名皆豎子
英雄也未到君行

古採蓮曲

洋洋長江水渺渺漲平湖田田青荇荷艷艷紅芙蕖
酣斜日外冉冉涼風餘萋萋誰家子裊裊二八初兩兩
並輕舟笑笑相招呼悠悠波上鴛潑潑蒲中魚采采不
盈手依依欲何如

擬迴文四首

春波綠處歸鴻過夜月明時飛鵲愁人去附書將恨寄
暮山雲斷倚高樓

又

樓上却來樓下待晚窗春盡斷回腸愁人有說嫌人問
淚洒新詩掃墨香

又

風幌半縈香篆細碧窗斜影月籠紗紅燈夜對愁魂夢
老盡春庭滿樹花

又

萋萋碧草連天遠杳杳行人幾日迴淒雨晚涼空坐久
淚粧殘暈濕紅腮

史內翰公奕一首

公奕字季宏，大名人士，出石晉鄭王弘肇父良臣宣和中擢第，終於潞州觀察副使。季宏大定二十八年進士，再中博學宏詞科，程文極典雅，遂無繼之者。累遷著作郎、翰林修撰、同知集賢院正、大中置益政院，楊吏部之美與季宏皆其選也。以直學士致仕，年七十三卒。季宏文章書翰皆有前輩風調，下至棊枰之技亦絕人，遠甚。

閒閒稱其溫厚謙退與人交愈久而愈不厭其
學問愈扣而愈無窮其見重如此詩文號洹水
集兵後失之子應祖字企先孫彥忠今在燕中

李雁門

天下三分二屬梁區區獨木欲支唐錦囊三矢傳遺恨
不救朱三着赭黃

龐都運鑄

二十首

鑄字才卿大興人家世貴顯明昌五年進士風

流文采為時輩所推字畫亦有蘊藉仕至京兆
運使自號默翁

雪谷曉寒圖

溪流咽咽山昏昏前山後山同一雲天公談笑玉雪噴
散為花蕊白紛紛詩翁瘦馬之何許忍凍吟詩太清古
老奴寒縮私自語作奴莫比詩奴苦木僵石老鳥不飛
山路益深詩益奇老奴忍笑憐翁癡不知嗜好乃爾為
楊侯胸中富丘壑醉裏筆端驅雪落因何不把此詩翁

畫向草堂深處着

景骨城驛中夜雨

畫角邊城暮孤春野水秋一川霜樹老萬葉雨聲愁自
古誰青眼勞生只白頭何時問漁父容我一扁舟

洛陽懷古

草樹蕭條故苑荒山川慘淡客魂傷玉光照夜新開塚
劍氣沈沙古戰場金谷更誰誇富麗銅駝無處問興亡
一尊且對春風飲萬事從來穀與臧

田器之燕子圖 器之自敘云明昌丙辰予從軍

塞外合虜里山野舍荒涼難以狀言春末有雙
燕亦巢此屋土人不之識屢欲捕之予曲為全
護此燕晝出夜歸予必開戶待之忽一日飛止
坐隅都無驚畏巧語移時不去予始悟明日秋
社此鳥當歸殆留別語也因作一詩贈之云幾
年塞外歷崎危誰謂鳥衣亦此飛朝向蘆陂知
有為暮投茅舍重相依君憐我處頻迎語我憶

君時不掩扉明日西風悲鼓角君應先去我何
歸此詩以細字寫之為蠟丸繫之燕足上明年
四月予受代歸又八年泰和甲子任潞州觀察
判官四月十二日偶坐解舍之含翠堂忽雙燕
至一飛簷戶間一上硯屏予諦視之繫足蠟丸
故在乃知此鳥蓋往年贈詩者也因請同年龐
君才卿畫為圖求諸公賦詩

器之姓田名琢雲
朔人明昌五年進

士仕至山東路宣撫使慷慨有志節
閒閒公所謂田侯落落奇男子者也

田君才畧燕雲客少年累有安邊策悔從筆硯取功名
直要橫馳沙漠北塞垣春雪白皚皚東風未放玄陰開
烏衣之國定何許一雙燕子能飛來三年驛舍安西道
眼底鶯花無夢到忽見低飛入短簷此身似向邯鄲覺
君居海東我中原相逢乃在穹廬前天涯流落俱為客
感時念遠空潜然長安何限高高閣晝夜風閒開翠幕
底事猜嫌不往依甘從此地風沙惡土人嗜肉無仁心
一生弋獵誇從禽有巢幸穩勿浪出汝身未必輕千金

朝來暮去益狎昵物我相忘情意一但怪重裘積漸添
元是西風催社日須知音巧惟鷓鴣忽來坐隅如告辭
我方留寓未歸得為君忍賦傷心詩詩成自述聊為戲
繫足封之亦無意燕已歸飛我未歸刁斗聲中忽驚歲
旄頭夜落妖氛收嫖姚獻凱歸神州玉關早喜班超入
北海不聞蘇武留君才經世寧終枉幕府須賢來上黨
別後歸期兩及瓜人間秋燕十來往沈沈官舍紅芳稀
葛衣燕居澹忘機忽聞巧語入簷戶大似相識來相依

一飛簷外窺庭樹一上屏山驚不去解足分明得帛書
真是當年留別句天生萬物禽最微固耶偶耶吾不知
古道益遠交情醺朝思暮怨雲遷移當時握手悲別離
一旦富貴棄如遺聞子燕歌應自疑慎無示之嗔我譏

楊之美尚書詩云危巢客舍久相依常記西風社日歸
海國傳心千驛隔塞垣回首十年非新詩尚在人空老
舊夢無憑鳥自飛寄語齊諧休志怪沙鷗相款解忘機
張巨濟云沙塞相逢命已輕翠堂重見眼增明小詩繫
足初無意巧語迎人獨有情陰德自招黃雀報機心能
致白鷗盟社前秋後風光好須賀他年大廈成李之純
云一別天涯十見春重來白髮一番新心知話盡春愁
處相對依依如故人王大用云相別相尋積歲年人心

不及鳥心堅莫償恩義三生債分付平安七字篇王謝
鳥兜疑誕說紹蘭紅線定虛傳何如此段人親見舊話
從今不直錢李欽叔云塞上光風已十霜仁心覆護獨
難忘當時相送詩仍在此日重來話更長客舍花開新
信息雲兜香冷舊昏黃主人得報君知否千古珠璣在
錦囊閒閒趙公三詩田思敬敬之刁白晉卿趙永元王
副樞子明詳節張雲卿
師緒各一詩此不具錄

晚秋登城樓二首

山勢碧環合溪光縞帶明牛羊成晚景砧杵助秋聲酒
薄人情廢官閒吏事生天東歸興滿不為憶尊羹

又

落日危樓上詩成只自哦清商行老矣紅葉奈秋何墮
甌前非悟跳丸去日多功名猶誑我未許著漁蓑

冬夜直宿省中

吏散庭空宿鳥過凍吟聊復戰詩魔
陶泓面冷真堪唾毛穎頭尖漫費呵
畏事政宜賓客少不才偏覺簿書多
西窗燈闇尊無酒奈此迢迢夜漏何

山行絕句

四面雲山玉作圍一川霜樹錦為衣
翩翩數騎南岡下

傳粉王孫射鹿歸

漉酒圖

我愛陶淵明愛酒不受官
彈琴但寓意把酒聊開顏
自得酒中趣豈問頭上冠
誰作漉酒圖清風起毫端
露電出形似神情想高閒
大似揮絃時目送飛鴻難
袖中有東籬開卷見南山
嗟予困塵土青鬢時一斑
折腰尚未免敢謂善閉關
望望孤雲翔羨羨飛鳥還
歸田未有日掩卷空長歎

夏日

富國才疎合自羞清時無補但優游只知錢向紙中裛
不信能教地下流

花下

香滿西園曉雨微萬紅千翠自高低若為常作莊周夢
飛向幽芳鬧處棲

梨花

孤潔本無匹誰令先衆芳花能紅處白月共冷時香縞

袂清無染冰姿淡不粧夜來清露底萬顆玉毫光

未開牡丹

國香半吐醉顏酡炫耀春光已自多愛惜不教催羯鼓
更澆卯酒看如何

却暑

九夏樓居不厭高更須直至冷雲巢風來蘋末聊自快
暑滿人間無處逃蔗蜜漿寒冰皎皎畫簾鉤冷月稍稍
閒思殿角生涼句誰為懸誠作解嘲

懷友

鏡裏衰顏失舊紅當年豪逸夢魂中山城對月中秋夜
隴雁寄書西北風遣興與誰同酒盞相思無處附詩筒
憑高想到消魂處落日無言水自東

喜夏

小暑不足畏深居如退藏青奴初薦枕黃妳亦升堂
鳥語竹陰密雨聲荷葉香晚涼無一事步屨到西廂

墨竹三首 隔溪烟雨

一溪流水玉涓涓
溪上脩篁接暮烟
誰倩能詩文與可
筆端移得小江天

又秋風驟雨

瀾川急雨暗秋空
無限琅玕澹墨中
劔甲縱縱軍十萬
欲將貔虎戰斜風

又春雷起蟄

千梢萬葉玉玲瓏
枯槁叢邊綠轉濃
待得春雷驚蟄起
此中應有葛陂龍

山谷透絹帖

君不見李廣射虎如射兔霹靂一聲石飲羽又不見巨
靈擘山如擘雲蓮華萬仞留掌痕精神入物物乃爾筆
端有神亦如此熙豐以來推善書日下無雙黃太史胸
中八法蟠虹霓峨眉仙人客並馳平生敗筆塚累累妙
處不減磨崖碑呂侯好古兼好異與字分身作游戲清
潭錯落印星壁大澤縱橫散龍蛻又如漢宮粉黛爭嬋
娟倚風顧影更妍豈無硬黃官紙與臨倣畫師寫照

非天然呂侯之子今詩仙傳家以此為青氈須防神物
有時合却逐六丁飛上天

許司諫古

四首

古字道真承安中進士在宣宗朝以直言極諫
稱哀宗即位首命驛致之洛致仕授右司諫未

幾乞身還伊陽

閒閒公制詞云安車蒲輪天子所以厚優賢之禮黃冠野服人

臣所以遂歸老之心其恩榮足以兩全而前後不可多得有臣如此如卿幾人具官道直以方氣剛而大議論非世儒所到名節以古人自期擢自先朝置之諫列斥安昌竊位已聞折檻之

忠及梁冀伏辜方見埋輪之志朕即大位稔聞
直聲起之於田里退閒之間超之於侍從論思
之地完備始終之節從容進退之間歎陽城之
耿言惜其將去念孔戢之既老挽之莫留特進
一階榮躋四秩華山拂袖最是為世上之閒神
武挂冠猶不負山中之相勉終晚節益介壽祺
郡守為起伊川亭道真性嗜酒老而未衰每乘
舟出村落間留飲或十數日不歸及泝流而上
老稚奔走爭為之挽舟數十里不絕其為時人
愛慕如此正大七年年七十四卒前三日有書
見及字已敬傾矣

青柯平二道人

深谷緣危磴長林繞碧山
山中四時好方外兩翁閒
身世青雲上塵埃大夢間
高情應笑我才到却空還

被召過少室

老病無堪合退休伊川久已得菟裘
如今又上長安道
好被青山笑白頭

扇圖

雲壓溪塘小雪春融融和氣浥輕塵
山禽共作梅花夢

物性由來懶是真

訪箕和尚峴山

箕出衣冠家在三屯山中有元夕懷京都詩云
一燈明處萬燈明天上人間不夜城前日惠林
洪覺範雪窗孤坐聽
猿聲甚為時人所稱

山中風定夜沈沈月滿禪林靜客心蒼檜四排嚴法界
孤松中立殷潮音鼓鐘有節人如玉臺殿無塵地布金
二月來游春尚淺紅梅無數照山陰

王防禦良臣 一十首

良臣字大用潞人承安五年進士作詩以敏捷
稱又於內典有所得入翰林與李欽叔善從軍
南征欽亦與行道中酬唱甚多有詩云蕎花冉
冉蜜脾香禾穗纍纍鵲眼黃一縷晚烟吹不去
為誰著意護秋霜欽叔愛之興定初自請北行
沒於軍中贈孟州防禦使

送任李二生赴舉

塵澁鰲鉤公子恨風吹馬耳謫仙愁
皇天老眼成人晚

今日男兒得志秋官樣文章堆筆底世情風色候江頭
主司不是冬烘物五色迷人莫浪憂

汴堤懷古

迷仙樓觀鬱連空一日都歸鬼唾中奢則兆亡天聽邇
去而不返水聲東鎖烟弱柳愁蛾綠閣雨幽花淚臉紅
總為錦帆歸不得至今啼鳥怨東風

旬休飲

嫋嫋東風雪外還又催春色動谿山百年莫作千年調

十日須謀一日閒，千丈歸心詩卷裏。
一襟豪氣酒杯間，醉鞭約住黃昏月。
馬首低懸玉半環。

息軒

乾沒皇皇西復東，不知假息禍機中。
黃金一旦隨肱篋，腐骨千年付攬蓬。
世味甜於刀上蜜，人心苦是夢中蟲。
一庵松雪雙明底，笑殺西山槁項翁。

九月七日飲

紫霞零落帶孤禽，平楚蒼蒼秋意深。
月過初三半梳玉。

菊迎重九滿籬金天憐病骨商量暖雲促歸程計會陰
風雁飛來更瀟洒一枝蘆雪印波心

牧牛圖

三摩不受一塵侵本分工夫日念深杖屨得迴遊子脚
葛藤灰盡老婆心顛狂不作風頭絮出入誰傷井底金
迴首人牛在何許一江明月夜沈沈

狸奴畫軸

三生白老與烏員又現吳生小筆前乞與黃家攘鼠禍

莫教虛費買魚錢

雜詩三首

道人知我愛禪房
淨掃階前紫石床
軟飽三杯風味好
脫巾和月卧昏黃

又

老子平生酷愛閒
天教行處得禪關
粥魚敲落簷頭月
猶在梅花醉夢間

又

殘陽收拾弟兄行
揀得機心不到鄉
安置小奴今夜夢
蘆花風細月如霜

高治中廷玉

四首

廷玉字獻臣恩州人大定末進士章宗衛王朝
甚有時名為人豪爽尚氣節一時名士多歸之
貞祐初自左右司郎官出為河南府治中與知
府復興屢以公事相可否時都城受圍使驛阻
絕復興為安撫副使懼獻臣謀已乃以造逆訊

之獻臣就逮龐才卿雷希顏王士衡辛敬之皆
被羅織幾有一網之禍比赦至獻臣瘐死矣獻
臣多作詩賦海中牛頭云鑿開混沌竅闖出神
農首人多稱道之猶子廣之今在河平

天津橋同李之純待月一首

驂鸞追散仙乘槎抵銀潢跳上玉龍背抱得銀蟾光素
娥愁不歸再拜捧瑤觴問以天上事玉色儼以莊爾能
為我歌白雪我亦為爾搗玄霜不然借我廣寒殿與我

長作無何鄉
傍有謫仙人
拍手笑我狂
天風忽吹散
人月兩茫茫

柳絮

斷送春歸去
紛飛不暫停
和風三徑雪
微雨一池萍
蝶惹依芳草
蜂沾過小庭
靜宜投隙地
狂欲攬青冥
得得穿朱戶
時時撲翠屏
黃鶯枝上語
似與訴飄零

道出平州寒食憶家

柳色方濃別玉京
程程又值石龜城
山重水複人千里

月苦風酸雁一聲上國春風桃葉渡東陽寒食杏花錫
楚魂蜀魄偏相妒兩地悠悠寄此情

飛山怨

漢家自有飛將軍軍中駭歎箭有神一朝乃與獄吏對
惜無千金書牘背手把屬鏤口銜須號天者三我何辜
伊吾壯志長已矣不得提攜玉龍死可怜休唱白浮鳩
至今秦人悲杜郵

李治中適六首

通字平甫樂城人明昌二年進士高才博學無
所不通為人滑稽多智而不欲表表自見工畫
山水得前輩不傳之妙龍虎亦入妙品然皆其
餘事也泰和中大興幕官時虎賊知府事賣權
恃勢奴視同列平甫每以公事相可否不少假
借又摘其陰事數十條欲發之虎謀篡者也聲
勢焰焰人莫敢仰視乃為一書生所抗積不平
先以非罪誣染之幾至不測雖有以自解竟坐

是仕宦不進以東平治中致仕閒居陽翟十餘
年自號寄庵先生平生詩文甚多如云舊管新
收粧鏡在昨非今是酒杯乾贈筆工云工不能
書何以筆士須知筆乃能書感事云半錢利路
人乃虎一鉤名餌吾其魚魯山道中云老夫自
喜林野僻路人頗笑衣裳寬散失之餘不復全
見矣臨終戒家人吾明日歸而輩慎勿遽哭果
如期而逝家人哭不禁良久開目云戒汝勿哭

令我心識散亂言畢目復瞑其明了又如此子
治字仁卿正大七年收世科屏山贈詩所謂仁
卿不是人間物太白精神義山骨者也

贈中山楊果正卿

士道彫喪愁天公陰靈慘慘塵濛濛三冬不雪春未雨
野桃無恙城西紅春光為誰作駘蕩造物若我哀龍鍾
數行墨浪合眼死一包閒氣終身窮中山公子文章雄
雅隨童稚為雕蟲襴衡不遇孔文舉坡老懶事陳元龍

唯之與阿將無同乾坤萬里雙飛蓬飄飄南北東西風

江村

陸地無根客江村有髮僧兩盂殘喘粥一寸苦吟燈

集句題廣寧勝覽亭

簷前無數好峯巒醉眼詩腸冰雪寒不識閭山真面目
請君來此凭闌干

獅子峯

解脫眼光三界靜端公伎倆一時休雲開正使金毛現

子細看來是石頭

送窮

昔年曾作送窮詩
結柳齋糧擬退之
送去還來還復語
君家猶有讀書兒

使高麗

去國五千里馬頭
猶向東宮情蕉葉
鹿世味蓼心蟲倦
枕三更夢征衫
八月風山川秋滿
眼歸思寄孤鴻

陳司諫規二首

規字正叔稷山人明昌五年進士博學能文詩
亦有律度為人敦厚動有禮節南渡以後諫官
稱許古陳規而正叔不以訐直自名尤見重云
仕至右司諫卒官子良臣今在燕中

送雷御史希顏罷官南歸

五事前陳志拂廟屹如砥柱閱頽波一麾共惜延年去
三黜何傷柳季和連蹇仕途如我老激昂衰俗在君多
扁舟南去知難戀萬頃烟波一釣蓑

過驪山

豐鎬無由問故基三章止見黍離詩而今多少華清石
都與行人刻艷辭

馮內翰延登 一十七首

延登字子駿吉州人承安二年進士令寧邊日
適閒閒公守此州與之考論文義相得甚歡故
子駿詩文皆有律度正大末奉命北使見留使
招鳳翔不從欲殺者久之割其鬚髯羈管豐州

二年乃得還天興初元授禮部侍郎京城陷自
投井中子駿資稟淳雅與人交殊欵曲讀書長
于易左氏傳好賢樂善有前輩風調嘗欲作國
朝百家詩而不及也有集號橫溪翁予過大名
見于其子源如賦德順道院隴泉云玉壘制方
維瓊漿閔仙宅何人劖雲根一旦泄地脈金匱
鎖龍釐月窟逗蟾液銅壺漏水清玉斗天醴碧
光搖日千道影落天一席窈然仇池穴自與天

壤隔又登封途中遇雨留僧舍云濕雲若烟低
飛雨如矢集近山衣已涼薄寒復相襲霽景函
草木秋意滿原隰林紅寒更殷山翠晴更濕不
知高幾許但見蒼壁立羣峰誰暇數庭笋紛戢
戢騰擲來眼中左右疲顧揖皆其得意句也

鄆城道中

北風慘澹揚沙塵鄆西三日無行人十村九村雞犬靜
高田下田狐兔馴昨朝屏息過溪口知有白額藏深榛

赤子弄兵更可惻路旁僵尸衣血新野叟偃僂行拾薪
欲語辟易如驚鷹瘦梅疎竹未慰眼只有清淚沾衣巾
元日隆安道中

山岡重複三竿日溪路縈迴一席天老境飄零情更惡
又從馬上得新年

宿三家寺

老柏蒼蒼纏老藤招提牢落有殘僧瞑禽自入藏經閣
飢鼠時窺照佛燈未得安心如北秀却思覓法趣南能

濛濛雨暗門前路更得雲房一曲肱

代郡楊黻之與余同辰月日時亦然渠有詩因為

次韻

陰陽亶亶定何如自信祥金先有模曾見唐生談躍馬
豈知阮籍哭窮途倦游笑我衰髯白弄筆怜君醉袖烏
便欲移書與歐九畧分餘論為噓枯

寄笏青柯平

飛雪驚沙捲屋茅清寒潑水透綈袍松風度壑江聲遠

蘿月當軒扇影高
敢對名山談世事
不妨空腹貯離騷
且將手版牢藏起
政恐山人識馬曹

射虎得山字

田翁太息論三害
獵騎俄驚見一斑
涎口風生雷吼怒
角弓寒勁月痕彎
柳營共許千人敵
魚服仍餘一矢還
我欲殘年賞神駿
短衣匹馬夢南山

雪

破屋寒無那
庭空雪已深
山川非舊觀
松柏見貞心
凍

雀爭遺粒棲鴉點暮林攜琴訪溪友清興憶山陰

華清故宮

寵貴羊羔退曲江華清霧閣對雲窗層巒未了霓裳舞
遷客俄驚羯鼓腔簷際疎星疑曉鏡天邊晴樹認高幢
遊人尚喜風流在白石涵波阜莢雙

西園得西字

芳逕層巒百鳥啼芝廬蘭畹自成蹊仙舟倒影涵魚藻
畫棟銷香落燕泥淑景晴薰紅樹暖蕙風輕汎碧叢低

岡頭醉夢俄驚覺歌吹誰家在竹西

八月十四日宿官塔下院二首

野僧引客看脩竹拄杖入林驚暝禽一道細泉鳴
蘚磴恍如閒聽穎師琴

又

喬松脩竹翠交陰涼月玲瓏地布金老懶無詩酬節物
夜涼閒聽候蟲吟

探春得波字

好雨新晴景氣和東陂冰盡水增波
茅茨影裏燕雙語桃李梢頭春幾何
霽靄未收芳陌潤斜陽偏傍小樓多
雕鞍畫轂方爭道更得留連藉綠莎

春雨二首

山市人歸暮雨飛倚筇久立看簷霏
乍來勢若懸麻密暫止聲如鼓瑟希
砌下蟻歸低赤幘簾間燕入濕烏衣
今宵客夢知安穩厭浥新涼到枕幃

又

小雨濛濛潤土膏
谷風習習不驚條
晨烟半濕低平野
春水初生沒斷橋
已見鶯黃勻柳麥
更看檀紫上榆椒
從今樂事知相繼
櫛比雲平看隴苗

藤花得春字

白白紅紅委暗塵
蒼藤次第看花新
龍蛇奮起三冬蟄
纓絡紛垂百尺身
見說紫雲偏得意
不知翠幄巧藏春
齋廚晚甌清香滿
未信侯門有八珍

蘭子野晚節軒

華顛益信寸心丹直道寧論末路難不歎士元淹驥足
但憂仲叔累猪肝籬根佳菊分秋色簷外長松耐歲寒
几有琴書尊有酒却愁兒輩覺清歡

洮石硯

鸚鵡洲前抱石歸琢來猶自帶清輝芸窗盡日無人到
坐看玄雲吐翠微

劉鄧州祖謙三首

祖謙字光甫安邑人承安五年進士歷州縣有

政迹拜監察御史以鯁直稱其不能俯仰世好
蓋天性然也正大初為右司都事除武勝軍節
度副使召為翰林脩撰家多藏書金石遺文畧
備父東軒工畫山水故光甫以鑒裁自名至於
信筆作簡牘尤有可觀一時名士如雷御史淵
李內翰獻能王右司渥皆遊其門得人一詩可
傳必殷勤稱道唯恐不聞人以此稱之子敏仲
今在平陽

雅集圖

翠雀翩翩野鶴孤
玉京人物會仙圖
後來且莫輕題品
席上揮毫有大蘇

崆峒山圖為橫溪翁二首

好奇仍有客相攜
絕頂披雲快一躋
三十六峰青似染
五年拄笏羨橫溪

又

獨占名山每羨渠
京塵今日汙吟鬚
西州十載經行處

惆悵雲烟是畫圖

高博州憲 八首

憲字仲常遼東人祖衍字穆仲國初進士仕至
吏部尚書伯父守義大定十六年進士父守信
以蔭補官叔守禮宣徽使仲常黃華之甥幼學
於外家故詩筆字畫俱有舅氏之風天資穎悟
博學強記在太學中諸人莫敢與抗泰和三年
乙科登第自言於世味澹無所好惟生死文字

間而已使世有東坡雖相去萬里亦當往拜之
屏山故人外傳說仲常年未三十作詩已數千
首矣釋褐博州防禦判官遼陽破沒於兵間

元夕無燈

九陌無燈夜悄然小紅時見點春烟多情惟有梅梢月
拍酒樓頭照管絃

寄李天英

稻結蒼蒼陂已枯西風剪剪弄楸梧蒹葭水落魚梁迴

蟋蟀聲高山驛孤社甕新成元亮酒并刀細落李鷹鱸
作詩遠寄霜前雁人在海東天一隅

題新山寺壁

列壑攢峯發興新落花飛絮舞餘春虛堂坐視三千界
冠者相從五六人澗草軟宜承屐齒溪泉清可濯纓塵
靜聽山鳥松風裏始悟人間樂未真

焚香六言四首

抹利花心曉露薔薇夢底溫風洗念六根塵外忘情一

炷烟中

又

滿地落花春曉一簾微雨輕陰正要金蕉引睡不妨玉
隴知音

又

紙帳收烟密下松灰卷火常虛午寂春閒小睡人間自
有華胥

又

沈水濃薰甲煎宮梅細點波津奕奕非烟非霧依依如
幻如真

長城

秦人一鍛連雞翼六國蕭條九州一祖龍跋扈侈心開
牛豕生民付礧礧詩書簡冊一炬空欲與三五爭相雄
阿房未了蜀山上石梁擬駕滄溟東生人膏血俱枯竭
更築長城限裘褐卧龍隱隱半天下首出天山尾遼碣
豈知亡秦非外兵宮中指鹿皆庸奴驪原宿草猶未變

咸陽三月為丘墟黃沙白草彌秋塞惟有坡陀故基在
短衣匹馬獨歸時千古興亡成一慨

王監使特起

七首

特起字正之代州崞縣人智識精深好學善論
議音樂技藝無所不能長於辭賦出入經史摘
其英華以為句讀如天造神出至得意不減郭
黼在張代州門下與屏山為忘年友泰和三年
進士甲科調真定府錄事參軍有惠政民立碑

頌其遺愛改令沁原又遷司竹監使朝議欲以
館職召試會卒遊龍德宮聯句云棘猴未窮巧
槐蟻或失王賦雙峰競秀云龍頭矗雙角駝背
堆寒峰華山云三峰盤地軸一水落天紳造化
無遺巧丹青總失真閒閒公屢哦此詩以為妙

沁源山中

野夫不識武城宰問之無言色微改但說今年秋雨多
黃芪滿谷無人采踏遍西城錦石盤暮投佛屋解征鞍

隔林依約見燈火山谷人家初夜寒

挽張代州詞大節

砥柱堂堂閱潰川諫書一紙力回天
兩朝眷倚傳龜玉五郡歡謠被管絃
茂舍棠陰餘舊綠夜臺松月耿孤圓
行人謾洒碑前淚誰識顏公是地仙

謾作

有時幽鳥話心事無限秋蟲誇口才
北闕上書吾老矣東籬把菊思悠哉
竹林留得巨源在蓮社招入淵明來

不然餘子敗人意懷抱耿耿胡為開

偶作

人情爭勝似爭碁死怕輸人一着遲黑白不分傍袖手
年來吾亦愛吾癡

絕句二首

山勢奔騰如逸馬水流委曲似驚蛇溪靈不欲露天巧
眼力未到雲先遮

又

鳥語留春春已迴
落花隨意卧蒼苔
清明寒食因循過
萱草薔薇次第開

下第

人間萬事等擗筭
敢謂何人不得盧
勝負到頭俱偶爾
狂夫安用繞牀呼

李經 五首

經字天英大定人
作詩極刻苦如欲絕
去翰墨
蹊逕間者李趙諸人
頗稱道之嘗有詩云
雁奴

失寒更拍拍叫秋水天長夢已盡秋思紛難理
最為得意其餘或有不可曉者累舉不第卒

雜詩五首

長河老秋凍馬怯冰未牢河山吟鞭底日暮風更號

又

晨井凍不爨誰療壯士飢天殿玉山禾不救我馬噓

又

塵埃汨沒伺候工離騷不振矜魚蟲風雲誰復話著蔡

不圖履狶哀屠龍挾牋擲管坐書空
咿嘸堂上酣歌鐘
乃知造物戲兒童不妨遠目送歸鴻
莫恠魏匏無所容
此去未許江船東五經不掃途轍窮
門庭日月生皇風
太阿補室礪以石坐掃鸛鶴搖天雄

又

巖椒鬱雲日夕生陰雨雪縞夜秋黃
老林人烟墨突樵
徑雲深

又

造物開巖地巖帳揜劒壁苔花張古錦霜苦老秋碧日
夕雲竇陰風鼓泉湧石馬蹄忌礲确樵道生枳棘盤盤
出井底迴首悵如失長老不耐事底事挂塵迹披雲出
山椒白鳥表林隙

梁太常持勝一首

持勝字經甫絳州人本名洵義避宣宗諱改父
襄字公贊大定初進士質直尚義有古人之風
仕至保大軍節度使有諫興陵田獵表傳於世

其賀章宗即大位表云曾天子祖天子世嫡相
承舜何人予何人自強不息又自河南府倅移
華州防禦使謝上表云昔同雒邑已陪嵩岳之
呼今領華防願效封人之祝世亦稱之經甫泰
和六年進士制策優等宏辭亦中選為人儀觀
雄偉以文武志膽見稱貞祐初由太學博士為
咸平治中宗室承裕辟為僚佐承裕死太平謀
不軌以兵脅經甫使作文移經甫大罵不從即

日遇害時年三十六贈韓州刺史初赴官有詩
云山雲欲雨花先慘客路無人鳥亦悲人以為
讖云

海棠

野杏山桃委路塵芳華都屬錦城春只緣造物偏留意
任使無香亦可人粉白謾誇粧樣巧胭脂難染睡痕新
沈香亭子勾欄畔消得君王比太真

愚軒居士趙元 三十四首

元字宜之定襄人經童出身舉進士不中以年
及調鞏西簿未幾失明自少日博通書傳作詩
有規矩泰和以後有詩名河東李屏山為賦愚
軒有落筆突兀無黃初之句愚軒宜之自號也
用是名益重南渡以後往來洛西山中閒閒公
雷御史王子文許至忠崔懷祖皆愛之所至必
虛左以待為人有材幹處事詳雅既病廢無所
營為萬慮一歸于詩故詩益工若其五言平淡

處他人未易造也宜之之父名淑字清臣由門
資敘與先隴城為莫逆交故好問交游間得宜
之之詩為多子顯有隱節今居鄉里

鄰婦哭

鄰婦哭哭聲苦一家十口今存五我親問之亡者誰兒
郎被殺夫遭虜鄰婦哭哭聲哀兒郎未埋夫未迴燒殘
破屋不暇葺田疇失鋤多草萊鄰婦哭哭不停應當門
戶無餘丁追胥夜至星火急并州運米雲中行

渡洛口

一脈寒流兩岸冰
斷橋無力强支撐
忘機羨殺沙鷗鳥
不省人間有戰爭

書懷繼元弟裕之韻四首

著龜不須問我命
只自知多生墮宿業
世網纏綿之驂
騶受羈銜大笑跛鼃遲
跛鼃亦復笑縮首
甘自卑何必
參漆園物理本自齊
檳榔可消穀志士常苦飢
穆之萬人雄猶不免此
譏我懦更多病區區欲
何為鍾鼎不可

老王
倖藜藿分所宜安能如黃蜂為人填蜜脾清白儻少汗
聲平後人何所貽初學悔大謬篆刻工文辭年來厭酸醎
淡愛陶潛詩愛詩固自佳其如未忘機回頭四十年言
動俱成非誰能逐世利日久常規規惟當種溪田與子
常相期

又

窗扉有生意山間春到時長安冠蓋塵游哉不如茲西
疇將有事老農真吾師不見元魯山夢寐役所思遺山

乃其後僻處政坐詩時復一相過照眼珊瑚枝奇書多
攜來為子卧聽之

又

少從白衫游氣與山崢嶸一念墮文字腸腹期拄撐多
機天所災室暗燈不熒拈書枕頭睡鼻息春雷鳴泰山
與鴻毛何者為重輕蹄涔與渤澥誰能較虧盈如能平
其心一切當自平

又

嵩箕有奇姿出雲何悠然雲山足佳處留客今幾年有
子罷讀書求種山間田栗里愧淵明香山慙樂天二老
已古人相望雲泥懸得酒邀月來對影空自憐攝衣欲
起舞稚子不須牽

喜霽

片段溪雲破縱橫野水淙人間泥塞路蠅動日烘窗印
壁苔痕滿侵階樹影雙還思釀新黍甕面挹秋江

詩送辛敬之東歸二首

風埃憔悴舊霜袍老去新詩價轉高
橡栗漫山猶可煮不須低首向兒曹

又

文章無力命有在一點浩然天地間
風雪滿頭人不識又攜詩囊出西山

脩城去

甲戌歲忻城陷官復完治途中聞哀歎聲有感而有作

脩城去勞復勞途中哀歎聲嗷嗷幾年備外敵築城恐不高城高慮未固城外重三壕一鋏復一杵瀝盡民脂

膏脂膏盡猶不辭本期有難牢護之一朝敵至任推擊
外無強援中不支傾城十萬戶屠滅無移時敵兵出境
已踰月風吹未乾城下血百死之餘能幾人鞭背驅行
補城缺脩城去相對泣一身赴役家無食城根運土到
城頭補城殘缺終何益君不見得一李勣賢長城莫道
世間無李勣

田間秋日三首

好雨知時便放晴天和醞釀作西成秋收但得官軍飽

未怕輸租遠十程

又

禾穗纍纍豆角稠
松前村落太平秋
熙熙多少豐年意
都在農家社案頭

又

皤翁偃僂負薪行
稚子跳梁剥棗聲
不似二姑忙更殺
晚春推髻脫釵荆

客況

廬山踏遍却歸崧世事悠悠付老慵
樂近僧居非佞佛
苦無田種強為農
菊花雨似人情冷
梨葉霜如酒力濃
一十五秋河表客
合教節物笑龍鍾

學稼

不堪炊煮一箱書
十口東西若可餬
食祿已慙中隱吏
墾山聊作下農夫
藁遺場圃無多積
子入官倉困遠輸
近日愚軒睡眠少
打門時復有追胥

立秋日

況味年來老比丘禪房三伏得遲留連宵雨作垂垂曉
十口家貧盼盼秋熟未先須伺禾黍有無何暇問衣裘
半生枉却親燈火一事不成空白頭

村居夏日

官府不著名散迹村落深白雲自朝暮青山無古今愛
此夏日永門巷多繁陰呼兒具繩床不履亦不簪殷勤
好風來為我消煩襟一飽萬事了何用腰黃金羈勒困
名馬網羅多珍禽何如山鹿癡呦呦戀長林

次韻答裕之

薄暮敲門喜客佳
水萍風絮共天涯
行藏一語傾心肺
古律三詩淬齒牙
朱研不妨閒度日
青山終得共餐霞
扶持老病須君輩
滿地豺狼萬里家

書懷

懶退無心廩與庖
願攜諸子劖山礲
閒消白日醒吟醉
猛省浮生夢幻泡
窈窕雲山三兔窟
漂搖風樹一鳩巢
聯名便入村家社
莫認公卿是故交

寄裕之二首

汨沒兵塵滿鬢霜
買鄰心樂古清涼
閒陪老秀春行脚
悶欠臞元夜對床
正欲脫身求兔窟
誰能隨世轉羊腸
南陽未比嵩陽好
滿眼交游即故鄉

又

老懶愚軒百不能
飽諳人意冷於冰
清狂舊日耽詩客
灰朽而今有髮僧
服褊紙衾三丈日
話延雪屋一龕燈
新開一徑通蘭若
斬盡清涼舊葛藤

丙子夏卧病汗後有作

枯腸得水若通靈
渙汗週身一雨零
行客筋骸困方歇
醉人心骨喚初醒
病蟬移夢入新殼
老鶴息神梳舊翎
乞得殘骸對兒女
不愁無粟貯陶瓶

宿少林寺

雙輪走雞樓下嶺
分間道行行得精
舍翠崦作迴抱諸
峰知客來故故顏色好
征衫滿塵土慙愧方丈老
殷勤一瓣香為我除熱惱
世緣如落花籬裊跡俱掃
箇中有一

佳處行脚恨不早一庵祖師傍異日親結草

晚出

坐久卧還起畏此夏日長出門髮蓬鬆西日明半牆鳩
鳴舍東柳雌和牆南桑十日暑煩苦一雨方論量偶然
釋憂抱露坐移繩床群兒莫相催老子便晚涼

次韻裕之見寄二首

魚入深淵鶴在陰飛潛何幸遠庖砧乾坤萬里雲無迹
冰雪三冬柏有心故國勾留清夜夢歲華分付白頭吟

莘川擬作桃源隱共與青山閱古今

又

古屋颼颼四壁塵不堪幽獨足吟呻
瓶儲看客常年慣家具為農近日新
世味飽嘗惟可睡詩情漫苦不醫貧
相從分我西山半欲乞臞元伴老身

題裕之家山圖

繫舟盤盤連石嶺牧馬澄澄倒山影
山光水氣相混涵中有元家舊廬井
雁門一開豺虎場駕言投迹嵩之陽

青山偃蹇不可將十年竟墮兵塵黃東巖風物知猶在
說與寄庵神已會一揮淡墨能似之清輝遠寄形骸外
元家故山吾與鄰夢見不如畫圖真舊曾行脚聊經眼
未得歸時亦可人

早發寶應龍門道中有感

山僧送客客行東回首雲寮夢寐中人語咿啾村店火
帽簷欹側石門風伊川遠映春冰綠少頂先攬曉日紅
為問年來幾還往只應烏鵲識衰翁

欽若遽有商於之行作長語為別兼簡仲澤弟一

笑

廬山鋌然深可居洛水蚓然清可漁嘉哉山水有如此
不能留客如遽廬楚茅不入干王誅大帥分閫臨商於
謀參帷幄渴英俊蒐羅遠到山間癯隴西四欽出將種
人愛若也溫而愉竭來誰飛薦鶚書枕前墮檄催馳驅
行參幕賓亦大可把酒當為帥君賀王家仲澤如仲宣
共看吐奇飛玉唾一軍號令雅歌中聲落荆蠻膽先破

愚軒退居如甌墮閒暇多君時見過明朝笑語隔關山
一月須拚面牆卧

丁亥三月二十五日雪

夬變乾將至陰凝陽不流雨飛猶帶雪風急似號秋草
木無春意關河慘客愁天心寧易測三歎索冬裘

大暑

旱雲飛火燎長空白日渾如墮甌中不到廣寒冰雪窟
扇頭能有幾多風

讀樂天無可奈何歌

鳬脰苦太短
絃足何其多
物理斬不齊
利劍空自磨
老跼富且壽
元惡天不訶
伯夷豈不仁
餓死西山阿
天意冥冥邈
人心徒揣摩
不如且飲酒
流年付蹉跎
酒酣登高原
浩歌無奈何

哀古道

山深道壞水縱橫
怪得春來少客行
不信天教人跡斷
水乾更遣蒺藜生

薛鼎臣罷登封

弄人鼓笛不相疑，便著登場傀儡衣。終日抱飢唯飲水，

也和醉客一時歸。

鼎臣材大夫宰，登封有惠政，今以例罷，故有上句。

密國公璫四十一首

密公字子瑜，興陵之孫，越王之長子。百年以來，

宗室中第一流人也。少日學詩于朱巨觀，學書

于任君謨，遂有出藍之譽。文筆亦委曲能道所

欲言，朝臣自閒閒公楊禮部、雷御史而下皆推

重之資雅重薄于世味好賢樂善寒士有不能
及者明昌以來諸王法禁嚴諸公子皆不得與
外間交通故公得窮日力於書讀通鑑至三十
餘過是非成敗道之如目前越王薨後稍得出
游文士輩亦時至其門家所藏法書名畫幾與
中秘等客至貧不能具酒有設蔬飯與之共食
焚香煮茗盡出藏書商畧之談大定明昌以來
故事或終日不聽客去風流蘊藉有承平時王

孫故態使人樂之而不厭也所居有樗軒又有
如庵自號樗軒老人其詩號如庵小藁園城中
以疾薨時年六十一

秋郊雨中

羸驂破蓋雨淋浪一抹烟林覆野塘不著沙禽閒點綴
只橫秋浦更淒涼

宴息二首

宴息春光晚閒眠晝景虛冥心居大道達理契真如樂

對忘形友欣逢未見書世間幽隱者何必盡樵漁

又

日日閒窗下簞瓢樂不殊花魁穠且艷湖玉秀而臞憶
友尋詩卷思山展畫圖丹青傳六逸能著老夫無

梁臺

汴水悠悠蔡水來秋風古道野花開行人驚起田間雉
飛上梁王鼓吹臺

自適

晴晝搖涼光長空澹虛碧燕鴻亦何為老翅南又北衰
柳隨殘葉庭戶覺岑寂幽人誦佛書清香縈几席西方
病維摩東臯醉王績俱到忘言地佳處畧相敵小齋蝸
角許夜卧膝仍屈能以道眼觀寬大猶四極有書貯實
腹無事梗虛臆謝絕聲利徒尚友古遺直

城西

雁帶邊聲遠牛橫廢壠長人居似河朔岡勢接滎陽禾
短新村野沙平古戰場悠然望西北暮色起悲涼

送王生西遊

伯飛

紫陁仙人今淵雲騎風御氣七尺身丈夫恥與噲等伍
故作野鶴昂雞羣往年書劍游梁日咳唾中間滿珠璧
溫子徒勞手八叉蘇老猶迷日五色慨然拂袖遊嵩陽
西南陌上書傳香仲宣堂堂舍我去舉杯却愁愁更長
去程相近黃花節三十六峰如玉列龍門楓葉墮紅綃
洛浦蘆花舞晴雪勲名細事猶秋毫政可痛飲讀離騷
天津月照紫綺裘緱嶺風吹青玉簫我無羽翼隨君起

浩歌相送秋光裏，憑高西望青茫茫。
落日無情下寒水，王生以秋騷見示，復以此謝之。

三年京國與君遊，每恨知君尚未周。
始露雄文凌楚些，又登長陌佩吳鉤。
燈殘茅店雞催曉，霜落金風雁喚秋。
後夜文星出西洛，仲宣知在水南樓。

自題寫真

枯木寒灰久亦神，因緣來現昨公身。
只緣酷愛東坡老，人道前身趙德麟。

檇軒嘗封胙國公，故云。

黃華畫古柏

黃華老人畫古柏鐵簡將軍挽大弔意足不求顏色似

荔支風味配江瑤

鐵簡萬戶以神射名天下

書龍德宮八景亭

刻楠朱楹墮紺紗裙腰草色趁階斜誰知剝落亭中石
曾聽宣和玉樹花

思歸

四時唯覺漏聲長幾度吟殘蠟燼缸驚夢故人風動竹

催春羯鼓雨敲窗
新詩淡似鶯黃酒
歸思濃如鴨綠江
遙想翠雲亭下水
滿陂青草鷺鷥雙

如庵樂事

人間最美安心睡
睡起從容盥漱終
七卷蓮經藝沈水
一杯湯餅潑油蔥
因循默坐規禪老
取次拈詩教小童
炕暖窗明有書冊
不知何者是窮通

題晉卿王暉寶繪

顧陸張吳寶繪堂
風花雪月保寧坊
錦囊玉軸三千幅

翠袖金釵十二行數筆丹青參季范一時遷謫為蘇黃
太原珍玩名天下舊跡猶憑古印章

得友人書

聞有書來喜欲狂紫芝眉宇久難忘別離惟歎我頭白
詩句屢成君馬黃公幹羈栖猶洛下孔明高卧尚南陽
冷官領取閒中趣遠勝區區夢蟻忙

內族子銳歸來堂

一旦能知夢裏真平生看破主中賓歸來堂上忘形友

名利場邊稅駕人東郭風烟宜蕙帳南山猿鶴識綸巾
清尊雅趣閒碁味盞盞沖和局局新

題潘閬夜歸圖

不是詩人灞水孺又非野老曲江邊風姿便認王摩詰
蘊藉還疑李謫仙驢背倒騎蓮岳下牛腰穩跨竹林前
掀髯對月餘高興明日佳篇幾處傳

漫賦

貧知囊底一錢無老覺人間萬事虛富貴儻來終作麼

勲名便了又何如
季鷹未飽松江鱸
魯望將成笠澤書
自是杜門無客過
不關多病故人疎

寓跡

寓跡山中記昔年
西溪卜築欲終焉
飄零何在五株柳
離亂難歸二頃田
漫叟未能忘野寺
道人猶解識林泉
吾鄉已宅無何有
一笑醺雞盡甕天

秋晚出郭閒遊

塵中俗事海漫漫
暫出城闌借眼寬
沙麓去邊羣牧小

野雲平處一鵬盤
殘荷露水秋光晚
衰柳搖風古渡寒
此幅大年橫景畫
魯岡圖上似曾看

老境

老境惟禪況幽居
似寶坊酒盃盛硯
水經卷貯詩囊懶
甚書彌少閒多夢
自長不知何處雨
徑作夜來涼

北郊晚步

陂水荷凋晚茅簷
燕去涼遠林明落
景平麓淡秋光羣
牧歸村巷孤禽立
野航自諳閒散樂
園圃意尤長

閒詠

歲晚陶元亮平生馬少游凋殘半枯木浩蕩一虛舟
鶴望塵迷眼雞栖屋打頭瓶儲尚蕭索焉敢計菟裘

池蓮

輕輕姿質淡娟娟點綴圓池亦可憐數點飛來荷葉雨
暮香分得小江天

梁園

一十八里汴隄柳三十六橋梁苑花縱使風光都似舊

北人見了也思家

釋迦出山息軒畫

厖眉袖手出巖阿及至拈花事已訛千古雪山山下路
杖藜無處避藤蘿

過胥相墓

亭亭華表映朱門始見征西宰相尊下馬讀碑人不識
夷山高處望中原

秋日小雨

白鷺徘徊花鴨遊城南城北幾汀洲
綠荷風底飛來雨
做弄今年甲子秋

東郊瘦馬

此歲無秋畎畝空病驂難遣齧枯叢
倉儲自益駑駘肉
獨爾空嘶苜蓿風

枕上聽雨

卧聽羯鼓打涼州元是芭蕉細雨秋
庭際玉簪開幾許
小窗特地暮香幽

溪景

飛飛鷗鳥自徜徉也解新秋受用涼日暮碧溪微雨過
滿風都是藕花香

題紙衣道者圖

紫袍披上金橫帶藜杖拖來紙掩襟富貴山林爭幾許
萬緣唯要總無心

春半喜晴

陰寒二月雪含雲兩日開晴淑景新借問海棠紅幾許

杏花楊柳不曾春

漁父詞二首

楊柳風前白板扉
荷花雨裏綠蓑衣
紅稻美錦鱗肥
漁笛閒拈月下吹

又

釣得魚來卧看書
船頭穩置酒葫蘆
烟際柳雨中蒲乞
與人間作畫圖

馬伏波

可歎迂疎一老翁
豈堪床下拜梁松
明珠薏苡猶難辨
萬里爭教論杜龍

留侯

辟穀輕身慕赤松
不知誰舉傅春宮
君方避溺猶居水
忍使餘波及四翁

對鏡二首

鏡中色相類吾深
吾面終難鏡裏尋
明月印空空受月
是他空月本無心

又

明明非淺亦非深何事癡人泥影尋
照見大千真法體
不關形相不關心

夏晚登樓

登樓晚暑復相攻快意清風忽此逢
雲似碧山天似水
霽波平浸兩三峰


華亭

世尊遺法本忘言教外別傳意已圓
隻履攜將葱嶺去

不妨來上月明船



中州集卷五



總校官庶吉士臣侍朝

校對官庶吉士臣陳文樞

謄錄監生臣周學澐